

Rapport annual dalla presidenta



Preziadas commembras

Il onn 2021 ha entschiet tut ruasseivel senza perspectiva sin ina occurenza. Il sulet che nus havein menau atras ei nossa radunonza generala e quei per l'emprema ga a scret. Engraziel fetg per la buna partizipaziun da vossa vart. Era engraziar lessel jeu per vossa confidanza enviers la suprastonza e vies sustegn en general.

Per il di dalla dunna ils 8 da mars havein nus pachetau giu cors da tschugalata e repartiù a nossas commembras. In grond engraziament a La Conditoria che ha fatg per nus in prezi special. La suprastonza seperstgisa tier commembras che han survegniu nuot. Nus havein risguardau tut las dunnas che han giu pagau la contribuziun entochen quei di.

Enteifer la suprastonza havein nus giu sis sesidas. Vitier havein giu ina sesida speziala, nua che nus havein rimnau novas ideas per igl avegnir.

La Sonja Decurtins ha menau atras 6 gadas il suentermiezdi da troccas per nus. Tut ha gudiù suenter quei lung temps da puspei seser ensemen e dar in scart troccas.

Margrith Cavegn, Ursula Deplazes ed Imelda Monn han menau atras l'oraziun mundiala en favur da Vanuatu en baselgia. Engraziel fetg ad ellas per quella lavur.

Per las candeilas da Pastgas haiel jeu creau il motiv dallas candeilas. La gronda part dallas candeilas ha la Katrin ornau persula. Jeu sperel che quei seigi puspei pusseivel da far da cuminonza.

Ils 31 da mars havein nus encuretg ils ignivs dalla lieur da Pastgas a Cavorgia. Quei da cumpignia cun 12 affons da soletta e primara.

5 gadas ha la Petra organisau la sera da giugs. Nus essan adina ina pintga gruppa da 5 tochen 6 dunnas. Tuttina lein nus salvar quella occurenza. Igl ei adina emperneivel e legher.

La radunonza cantunala ei era vegnida tenuta a scret.

Il viadi da seniors dils 9 da settember a menau nus ell'ustria dil campadi viva giu Milar. Leu ha ei dau ina buna grillada.

Igl october era previu in cuors da zambergiar anials. Muort munconza d'annunzias havein desistiu da menar atras quell'occurenza.

La dumegia, ils 21 da november havein nus giu nossa fiera da Nadal. Nus havein giu ballesi'aura e bia glieud ha visitau la fiera. 36 expositurs han vendiu lur rauba e la purschida ei stada fetg varionta. Da l'autra vart ha l'ustria giu pli pauca glieud. Nus dalla suprastanza essan tuttina fetg contentas. Cun las mesiras da covid dadas avon dalla federaziun e vischnaunca (Covid-Massnahmen) astgavan nus buca spitgar dapli.

Engraziar lessel jeu a tut ils gidonters, ils sponsurs, la vischnaunca e naturalmein als expositurs per lur fideivladad. Igl ei bi da sentir il sustegn da tuttas varts.

Ils 1 da december ha la Katrin Mirocha menau atras in cuors da fimentar. Quel ei staus in success cumplein.

Era ils 1 da december havein nus zambergiar regals da Nadal cun ils affons dalla scoletta e primara. Gidau mei han la Lea Berther, la Fränzi Berther e mia feglia Flavia. Igl ei stau in carin suentermiezdi cun ils affons pigns.

Ils 6 da december ha la Claudia Berther-Maissen organisau in lotto da Sontgaclau per ils seniors/las senioras ella residenza Dulezi. In grond engraziament per quei bi suentermiezdi.

Il 7 da december havein nus giu in cuors da scriver a maun, igl aschinumnau "handlettering". En quei cuors ha Dania Beer (www.creania.ch) mussau a nus differentas modas da sciver e crear cartas da nadal.

Ulteriuramein havein nus organisau il suadont:

- ⇒ Purtau in regal als nievvaschi.
- ⇒ Purtau fluras allas giubilaras da 80 e 90 onns.
- ⇒ Susteniu in patrinadi da World Vision Svizra per igl affon Bagnaoukou Coulibaly.
- ⇒ Jeannette procura che nossa pagina d'internet www.uddt.clubdesk.ch ei adina actuala. Sin quella anfleis vus tuttas occurenzas e las impurtontas informaziuns da noss'Uniun da dunnas Tujetsch (UDDT).
- ⇒ Ils vestgius da Dumengi'alva havein nus daniev surdau al cussegl pastoral. Quei fa senn perquei ch'igl ei aschia pli sempel per omisduas varts.

In grond engraziament per tut las pettas che nus astgein adina puspei dumandar da far.

A tut las dunnas che segidan sin ina moda ni l'autra pil beinstar da noss'uniun
in grond engraziament

Engraziar lessel jeu era allas autoritads communalas per il sustegn finanziel.

Per finir lessel jeu era engraziar a mias collegas dalla suprastanza per la buna
collaboraziun. Engraziel fetg, fetg.

Cavorgia, ils 7 da mars 2022

Nicole Solèr

A handwritten signature in black ink, appearing to read 'N. Solèr' with a stylized flourish at the end.